

## NY LITORJIA MISY KOMINIONA MASINA DIOSESY TOLIARA (Synoda 2016)

### 1. HIRA FIDERANA

**2. FIARAHABANA SY TENY FAMPIDIRANA** (Fiarahabana araka izay heverin'ny Mpitarika ho mety na araka ny fomba mahazatra azy avy / ary teny fampidirana araka ny vanim-potoana atrehina)

**3. FIANTSOANA** (*Azo ampiasaina ireto teny manaraka ireto:*)  
(*Raha Andavanandro*)

Eveka/Presbytera: Derao ny Tompo

**Ny Rehetra: Amena**

*Na*

Eveka/Presbytera : Miderà ny Tompo fa tsara Izy

**Ny Rehetra: Mandrakizay ny famindrampony**

*Na*

Eveka/Presbytera : Fa na aiza na aiza no iangonan'ny roa na telo amin'ny Anarany

**Ny Rehetra: Eo afovoany ny Tompo**

*Na*

Eveka/Presbytera : Isaorana anie ny Anaran'ny Tompo

**Ny Rehetra: Hatramin'izao ka ho mandrakizay**

*Na*

Eveka/Presbytera : Hatramin'ny fiposahan'ny masoandro ka hatramin'ny filentehany

**Ny Rehetra: Hoderaina anie ny anaran'ny Tompo**

(*Amin'ny Krismasy*)

Eveka/Presbytera : Mpamonjy no teraka ho antsika Haleloia! Haleloia! Haleloia!

**Ny Rehetra: Amintsika Andriamanitra Haleloia! Haleloia! Haleloia!**

*Na*

Eveka/Presbytera : Zaza no teraka ho antsika. Haleloia! Haleloia! Haleloia!

**Rehetra: Zazalahy no nomeny antsika. Haleloia! Haleloia! Haleloia!**

(*Amin'ny PASKA*)

Eveka/Presbytera : Efa nitsangana Izy. Haleloia! Haleloia! Haleloia!

**Ny Rehetra: Efa nitsangana marina tokoa ny Tompo. Haleloia! Haleloia! Haleloia!**

*Na*

Eveka/Presbytera : Velona ny Tompo! Haleloia! Haleloia! Haleloia!

**Ny Rehetra: Velona marina tokoa Izy Haleloia! Haleloia! Haleloia!**

(*Amin'ny PENTEKOSTA*)

Eveka/Presbytera : Raiso ny Fanahy Masina

**Ny Rehetra: Isaorana anie ny Tompo**

*Na*

Eveka/Presbytera: Handrotsaka ny Fanahiko amin'ny nofo rehetra Aho

**Ny Rehetra: Aoka anie ho tonga aminay araka ny Teninao**

4. Eveka/Presbytera: Ho aminareo rehetra anie ny fahasoavan' i Jesoa Kristy Tompontosika sy ny fitiavan' Andriamanitra ary ny fampiraisana avy amin 'ny Fanahy Masina.

**Ny Rehetra : Ary homba ny Fanahinao.**

5. Eveka/Presbytera : Aoka isika hiomana amin' izao fanaovana sy fankalazana ny Eokarista Masina izao.

Ny Rehetra: ANDRIAMANITRA mamindra fo o ; atongilano amin'ny famindramponao ny sofinao ka henoy ny fitarainanay ary hazavao amin'ny Fanahy Masina ny fonay mba hahazoanay manolotra izao zava-miafina Masina sy Lehibe izao ; ary aoka ho tia Azy amin'ny fitiavana mandrakizay izahay .

*Na eo ambony na eo ambany*

Ny Rehetra: ANDRIAMANITRA Tsitoha o, ny fon'ny olona rehetra dia miharihary Aminao ny faniriany rehetra dia fantatrao ary tsy misy miafina Aminao. Diovny amin'ny fanolorantsain'ny Fanahinao Masina ny hevitra ny fonay mba ho tia Anao tokoa izahay ary hankalaza ny Anaranao Masina araka izay mety amin'ny alalan'I Kristy Tomponay . Amena.

6. DIDY FOLO (*amin' ny vanim- potoana hafa*).

7. NY KYRIE : Tompo o , mamindra fo aminay (3)  
Kristy o , mamindra fo aminay (3)  
Tompo o , mamindra fo aminay (3)

8. FIEKEN-KELOKA

*(Azo ifatenana ny iray na mihoatra amin'ireto teny fampiononana ireto):*

Eveka/Presbytera : Hoy ny TOMPO, MANKANESA aty Amiko ianareo rehetra izay miasa fatratra sy mavesatra entana , fa Izaho hanome anareo fitsaharana.

*Na*

Toy izao no nitiavan'Andriamanitra an'izao tontolo izao , nomeny ny zanany Lahitokana , mba tsy ho very zay rehetra mino Azy fa hanana ny fiainana mandrakizay.

*Na*

Mahatoky ka tokony hekena amin'ny fankasitrahana rehetra izao teny izao : tonga tety ambonin'ny tany i Kristy Jesoa hamonjy ny mpanota.

*Na*

Raha misy manota dia manana solovava ao amin'ny Ray isika , dia i Jesoa Kristy ilay marina , ary lzy no avotra noho ny fahotantsika.

*Na*

Raha ny ratsy fanahy miala amin'ny faharatsiana nataony ,ka manao izay marina sy mahitsy dia hovelomina ny fanahiny.

*Na*

Tsaroako ny fahadisoako ary eo anatrehako mandrakariva ny fahotako.

*Sy*

KOA aoka isika hiaiky ny fahotantsika amin'ny fibebahana sy ny finoana , ka ho vonona hitandrina ny didin'Andriamanitra hiaina amin'ny fitiavana sy amin'ny fihavanana amin'ny olona rehetra.

9. FIFONANA

Ny Rehetra : (*mandohalika*)

ANDRIAMANITRA Tsitoha o, Rain'i Jesoa Krsty Tomponay mpanao ny zavatra rehetra ary mpitsara ny olona rehetra . Malahelo izahay ka miaiky ny fahotanay sy ny helokay maro samihafa izay efa nanoheranay Anao matetika , tamin'ny hevitra sy ny teny ary ny atao ka nampirehitra ny fahatezeranao sy ny fahaviniranao marina taminay . Mibebaka marina tokoa izahay noho ireo haratsianay ireo , mampahory anay ny fahatsiarovanay azy , tsy zakanay ny fahavesarany , mamindra fo aminay, mamindra fo aminay , Ray mamindra fo indrindra o , mamela ny helokay rehetra nataonay tamin'ny lasa noho ny fitiavanao an'i Jesoa Kristy Tomponay. Ary hatramin'izao dia aoka izahay hanompo Anao mandrakariva

amin 'ny fitondran-tena ankasitrahanao ho voninahitra sy Lazan'ny Anaranao amin'ny alalan'i Jesoa Kristy Tomponay . Amena

#### 10. FAMELAN-KELOKA

Eveka/Presbytera : ANDRIAMANITRA Tsitoha , Mpamela heloka izay rehetra mibebaka marina , hamindra fo aminareo anie lzy , hamela sy hanafaka anareo amin'ny helokareo rehetra , hanampy sy hanatanjaka anareo amin'ny fahatsarana rehetra , ary hiaro anareo amin'ny fiainana mandrakizay. Amena

#### 11. GLORIA na HIRA HAFA (*araka ny vanim-potoana*).

Ny Rehetra :

VONINAHITRA ho an'Andriamanitra any amin'ny Avo indrindra,

Ary fiadanana ho ambonin'ny tany

Ary fankasitrahana ho an'ny olona anie

Midera Anao izahay

Misaotra Anao izahay

Mitsaoka Anao izahay

Mankalaza Anao izahay,

Misaotra Anao noho ny voninahitra lehibe izahay.

Andriamanitra Tompo o, Mpanjaka any an-danitra Andriamanitra Ray Tsitoha,

Tompo o, Jesoa Kristy , Zanaka Lahy tokana , Andriamanitra Tompo o , Zanak'ondrin'Andriamanitra , Zanaky ny Ray. Izay manaisotra ny fahotan'izao tontolo izao mamindra fo aminay

lanao izay manaisotra ny fahotan'izao tontolo izao , mamindra fo aminay.

lanao izay mipetraka eo ankavanan'Andriamanitra Ray , mamindra fo aminay.

lanao irery ihany no Masina

lanao irery ihany no Tompo,

lanao irery ihany no Kristy o, mbamin'ny Fanahy Masina no Avo indrindra amin'ny voninahitr'Andriamanitra Ray. Amena.

#### 12. NY KOLEKTA

Presbytera : Homba anareo anie ny Tompo

Ny Rehetra : Ary homba ny Fanahinao

Presbytera: Aoka isika hivavaka

## NY TENIN'ANDRIAMANITRA

#### 13. TESTAMENTA TALOHA

Mpamaky teny : Tenin'Andriamanitra avy amin'ny Testamenta Taloha nalaina avy amin'ny.....toko faha.....miatomboka amin'ny andininy faha.....

Mpamaky teny: (*Aorian'ny vakiteny*) Izany no Tenin'ny Tompo

Ny Rehetra : Isaorana anie Andriamanitra

#### 14. SALAMO NA HIRA

#### 15. EPISTILY

Mpamaky teny : Tenin'Andriamanitra avy amin'ny Epistily nalaina avy amin'ny.....toko faha....miatomboka amin'ny andininy faha....

Ny Mpamaky teny: (*Aorian'ny vakiteny*) Izany no Tenin'ny Tompo

Ny Rehetra : Isaorana anie Andriamanitra

## 16. HIRA (GRADOALY)

Presbytera : Homba anareo anie ny Tompo

Ny Rehetra : Ary homba ny Fanahinao

## 17. NY FILAZANTSARA MASINA

Ny Filazantsara Masina dia nalaina avy amin'ny Filazantsara nosoratan'i..... amin'ny toko faha.....miatomboka amin'ny andinin'ny faha.....

Ny Rehetra : Voninahitra anie ho Anao ry Tompo 0

*Na*

Hira (Haleloia)

Rehefa voavaky ny Filazantsara dia hoy :

Ny Presbytera: izany no Filazantsara masin' I KRISTY.

Ny Rehetra : . Isaorana anie lanao ry Tompo noho izany Filazantsaranao Masina izany.

*Na*

HIRA (Haleloia)

## 18. AZO ATAO NY HIRA

19. TORITENY (*Mitsangana ny olona rehetra. Atao aloha sy aorian'ny Toriteny*)Mpi-toriteny: Amin'ny Anaran'ny Ray sy Zanaka ary ny Fanahy Masina

Ny Rehetra: Amena.

*Na Vavaka*

## 20. AZO ASIANA FOTOANA FAHANGINANA NA HIRA

21. FOTO-PINOANA NIKEANA amin'ny Alahady sy ny andro fety lehibe (Vakina na na hiraina) Izaho mino an'Andriamanitra tokana, Ray Tsitoha nahary ny lanitra sy ny tant ary ny zava- tra rehetra na ny hita na ny tsy hita.

Izaho mino an'i Jesoa Kristy Tompo tokana, Zanaka Lahy tokan'Andriamanitra.Teraky ny Rainy talohan'izao rehetra izao, Andriamanitra avy amin'Andriamanitra, Fahazavana avy amin'ny fahazavana, Andriamanitra marina avy amin'Andriamanitra marina, Nateraka fa tsy natal Miray fomba amin'ny Ray, Izy no nahariana izao rehetra izao, Nidina avy tany an-danitra ho antsika olombelona sy ho famonjena antsika, Ary tonga nofo tao amin'i Maria Virjina noho ny herin'ny Fanahy Masina , ka tonga olombelona, Nohomboana tamin'ny Hazo Fijaliana ho antsika tamin'ny andron'i Pontio Pilato ,nijaly ary nalevina, Nitsangana velona tamin'ny andro fahatelo araka ny Soratra Masina, Niakatra any an-danitra, nipetra- ka eo ankavanan'ny Ray, ary ho avy indray amim-boninahitra, hitsara ny velona sy ny maty, Ka tsy hanam-pahataperana ny fanjakany.

Izaho mino ny Fanahy Masina , Tompo sy Mpamelona avy amin'ny Ray, Itsaohana sy omem- boninahitra miaraka amin'ny Ray sy ny Zanaka, Ary niteny tamin'ny vavan'ny Mpaminany,

Izaho mino ny Fiangonana iray Masina manerana izao rehetra izao , araka ny fanorenan'ny Apostoly, Izaho manaiky ny Batisa iray ho famelan-keloka, Ary miandry ny fitsanganan'ny maty sy ny fiainana ho avy. Amen.

## 22. TONOM-BAVAKA (*Sehatry ny tonom-bavaka*)

*Azo atao ity*

i.Mihainoa anay Tompo tsara ô.

*Na*

ii.Ray ô Mpamindra fo lanao, mpamela helokay mba raiso re ny vavaka.

*Na*

iii.Tompo ô, henoy 'zahay; miantso Anao Mba ekeo ny vavakay; Mitalaho.

*Na*

iv.Henoy ny feonay mankany Aminao sy ny vavakay ry Tompo ô!

Na

v.Mitombo Mandroso ao amin'I Kristy.

Na

vi.Mivavaka ho anao Aho.Izaho no Tompo, mivavaka ho anao Aho. Sarobidy Amiko, mivavaka ho anao Aho.

a) Vavaka tora-po

- Vavaka ho an'ny fifandraisan'ny Diosesy Toliara, Mpiasa rehetra, Departemanta eto amin'ny Diosesy, Eklesia, Fanjakana, Marary, Malahelo sns...

Na

b) Vavaka ho an'ny Eklesia An'i Kristy

(Ataon'ny ministera hoe: Aoka isika hivavaka)

ANDRIAMANITRA Tsihoa sy mandrakizay ô, ny tenin'Apostolinao masina no efa nampianaranao anay hanao fangatahana sy fivavahana ary fisaorana ho an'ny olona rehetra. Koa mangataka aminao izahay, mba raiso amin'ny famindramponao lehibe izao vavaka izao izay hataonay eto anatrehanao.

Ary velomy lalandava ny Eklesia Katolika ny fanahin'ny fahamarinana sy ny firaisana ary ny fifankatiavana. Ary aoka izay rehetra manaiky ny Anaranao masina hiray saina ny amin'ny teninao masina ary hifankatia tsara.

Ary mangataka aminao koa izahay, arovy ny mpanapaka kristiana rehetra, ary aoka ny Mpanolo-tsaina azy sy izay rehetra manam-pahefana hitsara marina, fa tsy hiangatra ka hanafay sy ratsy fanahy ary hanohana ny fivavahana marina aminao sy ny hatsaram-panahy.

Omeo fahasoavana, Ray any andanitra ô, ny Eveka sy ny Klerje rehetra, hanehoany ny teninao marina sady velona amin'ny fitondran-tenany sy ny fampianarany ary, hanolorany araka izay mety ho Sakramentanao Masina.

Ary omeo ny fahasoavanao avy any an-danitra ny olona rehetra, indrindra fa izay tafangona eto, mba handraisany ny Teninao Masina amin'ny fo manetry tena sy amim-panajana tsara, ka hanompoany anao tokoa amin'ny andro rehetra iainany.

Ary mangataka aminao izahay, Tompo ô, mba ampionony sy vonjeo amin'ny fahatsaranao izay rehetra zoim-pahoriana, na malahelo, na mahantra, na marary, na tra-doza hafa amin'izao fiainana mandalo izao.

Ary koa isaoranay ny Anaranao masina noho ny mpanomponao rehetra izay efa nodimandry tamin'ny finoana sy ny fahatahorana Anao, sady mangataka fahasoavana aminao izahay hanarahanay diany tsara, mba hiarahanay handova ny fanjakanao any an-danitra. Tanteraho izany, Ray ô, noho ny fitiavana an'I Jesoa Kristy Mpanalalana sy Mpisolovava anay. Amena.

### 23. FIFANOLORAM-PIADANANA

#### Eveka/Presbytera :

TENAN'i Kristy isika, tamin'ny Fanahy iray no nanaovana Batisa antsika ho amin'ny tena iray , aoka isika hitady izay hisian'ny fiadanana sy izay hahatsara ny fiaraha-miaina.

Na

HENOY ny tenin'i Jesoa Kristy Tompontosika : « Didy vaovao no homeko anareo , dia ny mba hifankatiavanareo , eny , aoka ho tahaka ny hitiavako anareo no mba hifankatiavanareo kosa , Izany no hahafantaran'ny olona fa mpianatro ianareo raha mifankatia.

Na

Ry malala, aoka hifankatia isika , fa avy amin'Andriamanitra ny fitiavana.

Sy

Homba anareo anie ny Tompo.

Ny Rehetra : Ary homba ny Fanahinao

HIRA 169 and 6:

Ry Trinite isaorana

Mba hampidino aminay

Firaisam-pihavanana

Mba hifankatiavanay. Amena

Na

Homba anareo anie ny fiadanan'ny Tompo; shalom, shalom, shalom (2\*)  
(Fiadanan'ny Tompo)2\*

Homba anareo anie ny fiadanan'ny Tompo; shalom, shalom, shalom.  
(Homba anareo anie ny fitiavan'ny Tompo; shalom, shalom, shalom.)2\*  
(Fitiavan'ny Tompo)2\*

Homba anareo anie fitiavan'ny Tompo; shalom, shalom, shalom.

Na

Ampiraiso Aminao izahay mba hahazanay hifankatia fa izany no Didinao  
Tompo o! Tompo o! Dia ny mba hifankatia!

Na

Namela fianarana ho antsika i Jesoa ny amin'ny fitiavana  
Fitiavana tsy mba manavakavaka e, fitiavana, fitiavana 2x  
(Mifankatiave e) 8x

## FISAORANA LEHIBE

24. HIRA RAKITRA

25. NY FANOLORANA

Presbytera : (*Rehefa tonga eo am-pelatanany ireo fanomezana nataon'ny Mpiangona*)

RY TOMPO Andriamanitra nahary izao rehetra izao ô , Isaorana lanao, Ny fahatsaranao no anananay izao harena atolotray Anao izao . Fa nomenao anay ny fahaizana samihafa izay nahomby sy niasaranay . Raisony tenanay mba hanatanterahana ny asa anirahanao anay eto amin'izao fiainana izao.

Na

Ry Tompo ô! mangataka Aminao izahay mba handray ity Fanatitra ity ; izay atolotray mpanomponao manetry tena sy torotoro fo mba hankasitrahana eo Imasonao .

Ny Rehetra : Isaorana mandrakariva sy mandrakizay anie Andriamanitra.

Na

HIRA 334

3-Dia raiso e ,ry Tompo ô,

Ny asanay izao,

Mba ahazoan'ny olonao

Ny fitahiana. Amen.

Na

HIRA 194

1-lzay atolotray

Anao, ry Tompo O,

Dia tsy anay re, Fa Anao,

Ka indro raiso'zao

Na

HIRA 249

3-Raiso ny Fahaizako

Ento mba hanaja Anao

**Raiso koa ny volako**

**Ho Aano tokoa izao**

Eveka/Presbytera : *(Rehefa raisiny ny mofo)*

RY TOMPO Andriamanitra nahary izao rehetra izao o ! Isaorana lanao, ny fahatsaranao no anananay izao Mofo atolotray Anao izao , vokatry ny tany lzy sady niasaran'ny tanan'olombelona ; ho tonga Mofon'ny fiainana ho anay izy.

*Na*

Rainay any an-danitra ô; raiso ity Mofo ity atolotray Anao ho voninahitry ny Anaranao ; ary mba hahazoan'ny olona kristiana rehetra na izay mbola velona eto ambonin'ny tany na izay efa lasa nodimandry tao amin'i KRISTY ny Famonjenao mandrakizay.

**Ny Rehetra : Isaorana mandrakariva sy mandrakizay anie Andriamanitra.**

*Na*

**HIRA 334**

**1-Ry Rainay ao an-danitra ô**

**Atolotray Anao**

**Ny mofo izay voavoatray**

**Hovoninahitrao.Amena**

Eveka/Presbytera : *(Rehefa raisiny ny Divay)*

Ry TOMPO Andriamanitra nahary izao rehetra izao o, Isaorana lanao. Ny fahatsaranao no anananay izao Divay hatolotray Anao izao , vokatry voaloboka izy sady niasaran'ny tanan'olombelona, ho tonga Kapoaky ny famonjena ho anay izy.

*Na*

Ry Tompo o ! atolotray Anao ity Kapoaky ny famonjena ity ho Fanatitra tianao sy ankasitrahanao mba hampandrosoana ny famonjena izao tontolo izao.

**Ny Rehetra: Isaorana mandrakariva sy mandrakizay anie Andriamanitra.**

*Na*

**HIRA 334**

**2-Eo amin'ny Alitaranao**

**No ametrahanay**

**Izao ilay kapoaky**

**Ny famonjena anay.Amena**

**26. NY VAVAKA FISAORANA (mandohalika)**

**Eveka/Presbytera:** Homba anareo anie ny Tompo

**Ny Rehetra:** Ary homba ny Fanahinao

**Eveka/Presbytera :** Asandrato ny fonareo

**Ny Rehetra :** Asandratray amin'ny Tompo ny fonay

**Eveka/Presbytera :** Aoka isika hisotra an'Andriamanitra Tompontsika

**Ny Rehetra :** Mety sy tokony hatao izany

Eveka/Presbytera : METY dia mety sady tsara tokony hataonay indrindra , na rahoviana na rahoviana ary na aiza na aiza , Ray Masina Mpanjaka any an-danitra Andriamanitra Tsitoha sy mandrakizay o, ny misotra sy midera Anao , amin'ny alalan'ny Zanakao malala indrindra.

Fa IZY no ilay Teninao velona , ary amin'ny alalany no naharianao ny zavatra rehetra sy naharianao anay araka ny endrikao . Izy no Mpamonjy nirahinao ho mpanavotra anay. Ny herin'ny Fanahy Masina no nahazoany nofo aman-dra ka niterahan'i Santa Maria Virjina Azy, Noho ny aminay no nanolorany ny tenany teo ambony Hazo fijaliana ,ka nofoanany ny fahafatesana sy nahariharyny ny fitsanganana avy eo anivon'ny maty . Izany no nahatanterahany ny teti-pamonjena ka nahazoany ny vahoaka Masina ho Anao . Nasandratrao ho eo amin'ny ankavananao any amin'ny Avo lzy , ka avy Aminy no nanirahanao ny Fanahinao Masina aminay.

Ary dia misotra Anao ankehitriny izahay, noho.....

Ary noho izany dia miara-misaotra sy mankalaza ny Anaranao malaza izahay , mbamin'ny Anjely sy ny Arkanjely ary ireo marobe any an-danitra , ka midera Anao mandrakariva hoe :  
**Ny Rehetra : MASINA , MASI NA , MASINA, ny Tompo Andriamanitry ny fahefana sy ny hery , manerana ny lanitra sy ny tany ny voninahitrao ry Tompo avo indrindra o, Amena.**

**ISAORANA** anie izay avy amin'ny Anaran'i Jehovah , **HOSANA** amin'ny avo indrindra.

## **27. VAVAKA FISAORANA 1**

**RAY** any an-danitra o, raiso ny fideranay amin'ny alalan'ny Zanakao Jesoa Kristy Mpamonjy anay , ary noho ny fanarahanay ny ohatra navelany sy noho ny fakatoavanay ny didiny, dia aoka ireto fanomezana ireto, dia ny Mofo sy ny Divay, mba ho tonga Tenany sy Rany, noho ny herin'ny Fanahinao.

Fa tamin' ilay alina namadihana Azy, dia nandray ny Mofo lzy, ary rehefa nisaotra lzy dia novakiany, ary nomeny ny mpianany ka nataony hoe: Raiso, hano, lty no Tenako izay homena ho anareo, izao no ataovy ho fahatsiarovana Ahy.

Ary rehefa vita ny sakafo, dia nandray ny Kapoaka lzy, ary rehefa nisaotra lzy dia nomeny Azy, ka nataony hoe: Misotroa amin'ity ianareo rehetra, fa lty no Rako, dia ny amin'ny fanekena vaovao izay halatsaka ho anareo sy ny maro ho famelan-keloka. Izao no ataovy ho fahatsiarovana Ahy, na rahoviana na rahoviana no misotro ianareo.

Noho izany Ray any an-danitra o, ataonay amin'ity Mofo ity sy amin'ity Kapoaka ity ny fahatsiarovana Azy , Ankalazainay sy hambaranay ny fanatitra tanteraka nateriny indray mandeha teo amin'ny Hazo Fijaliana ny nitsanganany tamin'ny maty ary ny niakarany any an-danitra sady antenainay ny fiaviany indray amim-boninahitra.

**AOKA** hambarantsika ampahibemaso ny zava-miafin'ny finoana:

**Ny Rehetra: Efa maty i Kristy**

**Efa nitsangana tamin'ny maty i Kristy**

**Mbola ho avy indray i Kristy.**

**RAY** o, raiso amin'ny alalan'ilay mpisoronabenay izao fanati-pisaorana sy fiderana izao, ary amin'izao fihinananay sy fisotroanay ireto fanomezanao Masina ireto eo anatrehan'ny fiandriananao , dia havaozy amin 'ny Fanahinao izahay , velomy amin'ny fitiavanao , ary ampiraiso amin'ny tenan'ny Zanakao Jesoa Kristy Tomponay.

**MIARAKA** Aminy sy ao Aminy ary amin'ny alalany, noho ny herin'ny Fanahy Masina : ary miaraka amin'ireo rehetra mitsangana eo anatrehanao , na eto an-tany na any an-danitra , dia mitaoka Anao izahay Ray Tsitoha o, ka midera Anao amin'ny feo tsy mitsahatra hoe: **Ny Rehetra : NY SAOTRA sy ny haja sy ny voninahitra ary ny hery anie ho Anao mndarakizay mandrakizay Amena .**

*(Raha lany ny Mofo na Divay efa voahasina nefa mbola nisy tsy nandray , dia hanamasina hafa indray ny Presbytera ka hanao hoe : « Ray any an-danitra o, ... Izao no ataovy ho fahatsiarovana Ahy » raha ny Mofo no hamasinina , ary hoe : « Ary rehefa vita ny sakafo..... ny fihaviany indray amim-boninahitra » raha ny Kapoaka no hamasinina).*

## **28. VAVAKA FISAORANA 2**

**RAY** ô, amin'ny alalan'i Jesoa Kristy Zanakao Tomponay , henoy izahay , ka raiso izao fanati-pisaorana sy fiderana izao , ary arotsahy aminay sy amin'ireto Mofo sy Divay ireto ny Fanahinao Masina ho tonga Tenany sy Rany ho anay izany.

**TAMIN'**ilay alina namadihana Azy , dia nandray ny Mofo lzy , ary rehefa nisaotra Anao lzy dia novakiany ilay Mofo , nomeny ny mpianany ka hoy lzy : « Raiso , hano , lty ny Tenako izay atolotra ho anareo , ataovy izao ho fahatsiarovana Ahy.



ARY toy izany koa rehefa vita ny sakafo , dia nandray ny Kapoaka lzy , rehefa nisaotra Anao lzy , dia nomeny ny mpianany ka nataony hoe : « Misotro amin'ity ianareo rehetra fa Rako lty , dia ny Ran'ny fanekena vaovao alatsaka ho anareo sy ny olombelona rehetra , ho famelan-keloka . Na rahoviana na rahoviana no misotro izany ianareo dia ataovy ho fahatsiarovana Ahy.

KOA noho izany Ray Masina indrindra o, miaraka amin'ireto fanomezana avy Amiao ireto , dia mankalaza sy maneho etoana ilay fanatitra tokana sy lavorary naterin'i Jesoa Kristy Tomponay izahay vahoakanao , sy ny fitsanganany tamin'ny maty ary ny niakarany any amin'ny voninahitry ny lanitra

**HOBIO NY FANDRESEN'I KRISTY**

**Ny Rehetra: Ny fahafatesanao no nandravanao ny fahafatesana, ny nitsangananao no namerenanao ny fiainana ho anay, AVIA ry Jesoa Tompo o, tongava amim-boninahitra.**

RY TOMPO Tsara indrindra ô, na dia tsy mendrika aza izahay, dia ao amin'ny Zanakao, ary rehefa mandray ny Tenany sy misotro ny Rany izahay, dia ataovy tena iray ao amin'ny vahoakanao rehetra, hatrizay hatrizay, ka ho mandrakizay.

MIANDRY ny fiavian'i Kristy amim-boninahitra sy ny famirapiratan'ny fanjakany izahay ka ataovy mitombo isan'andro amin'ny fanarahana Azy.

MIARAKA Aminy sy ao Aminy ary amin'ny alalany, noho ny herin'ny Fanahy Masina, dia hatolotra Anao ry Ray Tsiotra, ny haja sy ny voninahitra, hatramin'ny taloha sy ankehitriny, ary mandrakariva ho mandrakizay mandrakizay. Amena

## **29. VAVAKA FISAORANA 3**

ENY , Masina tokoa lanao ry Tompo , lanao ilay loharanon'ny fahamasinana rehetra. Mivavaka Aminao izahay .Arotsahy amin'ireto fanomezana ireto ny Fanahinao, mba hanamasina Azy ho Tena sy Ran'i Jesoa Kristy Tomponay.

TAMIN'ilay alina nanolorana Azy sy nanekeny an-tsitrapo hijaly sy ho faty, dia nandray ny Mofo lzy , ary rehefa nisaotra Anao lzy, dia novakiany ary nomeny ny mpianany , ka nataony hoe : « Raiso , hano, lty ny Tenako izay homena ho anareo ».

TOY izany koa rehefa vita ny sakafo , dia nandray ny Kapoaka lzy, ary rehefa nisaotra Anao indray lzy, dia nomeny ny mpianany izany ka nataony hoe: « Misotro amin'ity ianareo rehetra fa Kapoaky ny Rako lty, dia ny Ran'ny fanekem-pihavanana vaovao sy maharitra mandrakizay, izay halatsaka ho anareo sy ny olombelona rehetra ho famelan-keloka . Izao no ataovy ho fahatsiarovana Ahy »

ISAKY ny mihinana ity Mofo ity sy misotro amin'ity Kapoaka ity isika, dia mankalaza ny zavamiain'ny finoana.

**Ny Rehetra: Mahatsiaro ny nahafatesanao izahay , ry Tompo tafatsangana , ary miandry ny fiavianao.**

RAY o, mahatsiaro ny nahafatesan'ny Zanakao sy ny nitsanganany tamin'ny maty izahay, ka manatitra Aminao ity Mofon'ny fiainana sy ity Kapoaky ny famonjena ity, ary misaotra Anao noho ny nifidiananao anay hanao fanompoana eo anatrehanao. Ary dia mangataka Aminao amim-panetren-tena izahay izay mandray ny Tena sy ny Ran'i Kristy, mba ho tafakambana ho tena iray noho ny herin'ny Fanahy Masina.

TSAROVY Tompo o, ny Fiangananao manerana izao tontolo izao : Ampitomboay ao anatin'ny fitiavanao lzy miaraka amin'ny Evekanay sy ny Ministera rehetra ary ireo manana andraikitra amin'ny fiahiana ny vahoakanao.

TSAROVY koa ireo Kristiana namanay izay efa nodimandry tamin'ny fanantenana ny fananganana amin'ny maty, ary ireo rehetra efa nandao ity fiainana ity, raiso ao amin'ny fahazavan'ny fanatrehanao izy.

Ary ho anay, dia mangataka ny famindram-ponao izahay, mba hiarahanay mandova ny fiainana mandrakizay sy midera ary manome voninahitra Anao , miaraka amin'i Santa Maria Virjina, Renin'Andriamanitra, sy ireo Apostoly ary ny Santa rehetra izay nahatanteraka ny sitraponao, amin'ny alalan'i Jesoa Kristy Zanakao malala.

AMIN'ny alalany sy miaraka Aminy ary ao Aminy , amin'ny firaisan'ny Fanahy Masina , dia Anao Andriamanitra Ray Tsitoha , ny haja sy ny voninahitra mandrakizay doria. Amena

### **30. VAVAKA FISAORANA 4**

Voninahitra ho Anao, Andriamanitra Tsitoha;

Rainay any an-danitra o, noho ny famindramponao lehibe tamin'ny nanomezanao an'I Jesoa Kristy Zanakao -lahy Tokana hiaritra fahafatesana tamin'ny Hazo fijaliana ho fanavotana anay , fa teo no nanaovany fanalamboady sy fanatitra ary onitra ampy sy tanteraka ary saha noho ny fahotan'izao tontolo izao tamin'ny nanolorany ny tenany izay naterina indray mandeha . Ary koa nanendry ny fahatsiarovana ny Nahafatesany soa indrindra Izy sady nandidy anay ao amin'ny Filazantsarany masina hampaharitra izany mandra-piaviny indray.

Tamin'ilay alina namadihana Azy dia nandray ny Mofo Izy ; ary rehefa nisaotra Izy dia novakiany, ary nomeny ny mpianany, ka nataony hoe: Raiso hano, ity no tenako Izay nomena ho anareo: izao no ataovy ho fahatsiarovana Ahy.

Ary toy izany koa rehefa vita ny sakafo dia nandray ny Kapoaka Izy; ary rehefa nisaotra Izy, dia nomeny azy, ka nataony hoe: Misotroa amin'ity ianareo rehetra, fa Ity no Rako , dia ny amin'ny fanekena vaovao, izay halatsaka ho anareo sy ny maro ho famelan-keloka ; izao no ataovy ho fahatsiarovana Ahy, na oviana na oviana no misotro ianareo.

Koa noho izany , Tompo Ray any an-danitra o, dia manatitra izao fanomezanao Masina izao izahay mpanomponao ary manao eo anatrehanao ny fahatsiarovana nodidian'ny Zanakao hataonay ka mahatsiaro ny niaretany Masina sy ny nahafatesany soa sy ny nitsanganany mahery ary ny niakarany malaza ; ary misaotra Anao tokoa izahay noho ny fanomezanao tsy hita isa izay azony ho anay noho izany.

Ary mifona aminao izahay , Ray mamindra fo o, mihainoa anay; ary noho ny fahatsaranao dia aoka ny Teninao sy ny Fanahinao Masina no hitahiana sy hanamasinanao izao fanomezana izao , dia ny Mofo sy ny Divay, ho Tena sy Ran'ny Zanakao malala indrindra.

Ary maniry tokoa izahay mpanomponao Ray mamindra fo o, mba ho raisinao noho ny fahatsaranao izao fanati-piderana sy fisaorana izao .Ary mangataka Aminao ampanetren-tena izahay, aoka ny fahamendrehana'I Jesoa Kristy Zanakao sy ny nahafatesany ary ny fitokiany ny Rany , no hahazoanay sy ny Eklesiana ny famelana ny helokay sy ny fahasoavana rehetra vokatry ny nijaliany.

Ary mifona Aminao izahay; aoka anie izay rehetra mandray ity Komoniona Masina ity mba handray amim-pahamendrehana ny Tena sy ny Ra soan'I Kristy , ary ho feno ny fahasoavanao sy ny fitahiana avy any an-danitra ka hatao tena iray amin'I Kristy.

Ary dia aterinay sy atolotray amin'izao Tompo o ny sainay sy ny fanahinay ary ny tenanay ho fanatitra mety sy masina ary velona . Ary na dia tsy mendrika hanatitra fanatitra Aminao akory aza izahay noho ny helokay maro samihafa , mifona Aminao izahay , raiso amin'ny fankasitrahana ity fanompoana adidinay ity ; koa aza mandanja anay ,fa mamela ny fahadisoanay; amin'ny alalan'I Jesoa Kristy Tomponay , izay omem-boninahitra sy laza amin'ny firaisan'ny

Fanahy Masina , miaraka Aminao Ray any an-danitra o! mandrakizay mandrakizay.

**Ny Rehetra: Amena.**

31. Araka ny nampianarin'ny Mpamonjy antsika dia hivavaka isika hoe :

**Ny Rehetra : Ry Rainay any an-danitra ô; Hohamasinina anie ny Anaranao , ho tonga anie ny fanjakanao , Hatao anie ny sitraponao eto an-tany tahaka ny any an-danitra , Omeo anay anio ny hanina sahaza ho anay , Avelao ny helokay , tahaka ny hamelanay izay meloka taminay . Aza avela ho azon'ny fankam-panahy izahay , fa manafaha anay amin'ilay ratsy . Anao ny fanjakana sy ny hery , Anao ny voninahitra mandrakizay . Amena.**

## **FAMAKIANA NY MOFO**

32. Eveka/Presbytera:VAKINTSIKA ity Mofo ity handraisantsika anjara amin'ny Tenan'i Kristy.

**Ny Rehetra: ISIKA na dia maro aza dia tena iray ihany amin'i Kristy, satria Mofo iray ihany no ihinanantsika rehetra.**

## **FIARAHA-MANDRAY**

33. Eveka/Presbytera: NY Fanomezan'Andriamanitra dia ho an'ny vahoakan'Andriamanitra  
*Sy*

Fa ny nofoko no tena fihinana,ary ny Rako no tena fisotro ; izay mihinana ny nofoko sy misotro ny Rako no mitoetra ao Amiko ,ary Izaho kosa ao Aminy.

*Na*

MANATONA , ary raisony Tenan'i Jesoa Kristy Tompontosika , izay nomeny ho anareo , sy ny Rany izay nalatsany ho anareo . Ivelomy ao am-ponareo amin'ny finoana sy fisaorana lzy.

**Ny Rehetra: Tompo mamindra fo ô, tsy dia matoky ny fahamarinanay izahay no sahy manatona ity latabatrao ity , fa ny famindramponao maro sy lehibe no itokianay . Tsy mendrika izahay , na dia hihinana ny sombintsombiny latsaka avy amin'ny latabatrao akory aza , nefa lanao no Tompo mamindra fo mandrakariva .Ry Tompo be fahasoavana ô , aoka ny fihinananay ny Nofon'i Jesoa Kristy Zanakao malala sy ny fisotroanay ny Rany , no hanadiovan'ny Tenany ny tenanay feno fahotana sy hanasan'ny Rany soa indrindra ny Fanahinay, hitoeranay mandrakariva ao Aminy , ary Izy ato anatinay.Amena.**

Eveka/Presbytera: Indro ny Zanak'Ondrin'Andriamanitra ,Indro Ilay manaisotra ny fahotan'izao tontolo izao.

**Ny Rehetra: Tompoko ô tsy mendrika hidiranao ao ambany tafo-tranoko aho fa mitenena ihany fa ho sitrana ny fanahiko(x3).**

**Ny Rehetra : Zanak'Ondrin' Andriamanitra ô, izay manaisotra ny fahotan'izao tontolo izao, mamindra fo aminay. Zanak'Ondrin'Andriamanitra ô, izay manaisotra ny fahotan'izao tontolo izao , mamindra fo aminay. Zanak'Ondrin'Andriamanitra ô, izay manaisotra ny fahotan'izao tontolo izao , omeo anay ny fiadananao .**

*Amin'ny fanolorana izany amin'ny olona tsirairay dia hanao hoe :*

*Eveka/Presbytera : Ny Tenan'i Kristy*

***Ny Mpandray : Amena***

***Ny Mpitondra ny Kapoaka: Ny Ran'i Kristy***

***Ny Mpandray : Amena.***

## **NY FAMARANANA**

34. Eveka/Presbytera: Tompo ô! aoka ho raisinay amim-pahadiovam-panahy izay vao nohaninay ; ka hanjary fanafody fanasitranana ho amin'ny fiainana mandrakizay ny fanomezana natolotra anay androany.

*Na*

Tompo ô! aoka anie haharitra ato am-ponay ny Tenanao sy ny Ranao . Efa nohatanjahin'ny Sakramentanao Masina izahay ; ka aoka tsy hisy tavela ato anatinay izay pentipentina avy amin'ny fahotana.

*Na*

Misaora ny Tompo fa tsara lzy

**Ny Rehetra : Mandrakizay ny famindrampony**

**Ny Rehetra : ANDRIAMANITRA** Tsitoha ô, misaotra Anao izahay fa lanao efa namahana anay, ny Tena sy ny Ran'i Jesoa Kristy Tomponay. Atolotray Anao amin'ny alalany ny sainay sy ny fanahinay ary ny tenanay ho fanatitra velona. Iraho amin'ny herin'ny Fanahinao izahay mba hiaina sy hiasa, ho lazanao sy voninahitrao . Amena

*Na*

**ANDRIAMANITRA** Tsitoha sy Mandrakizay ô! misaotra Anao izahay ; izay efa nandray araka izay mety ity Sakramenta Masina ity , fa efa sitrakao ny hamahana anay ny hanimpanahy ; dia ny tenan'i Jesoa Kristy zanakao Mpamonjy anay sy ny Rany soa indrindra ; ka mampahatoky anay amin'izany ny fitiavanao anay sy ny fahatsaranao lehibe ary ny fanaovanao anay ho sampana velona momba ny Tenan'ny zanakao izay fiombonan'ny mino sy ho mpandova araka ny fanantenana ny fanjakanao mandrakizay noho ny nijalian'ny Zanakao malala sy ny Nahafatesany Soa indrindra . Ary mangataka aminao amim-panetren-tena izahay Ray any an-danitra ô , hanampy anay amin'ny fahasoavanao mba haharetanay amin'izany fiombonana masina izany , ka hahefanay izay asa tsara rehetra nokasainao hataonay , amin'ny alalan'i Jesoa Kristy Tomponay , izay omem-boninahitra sy laza miaraka Aminao sy ny Fanahy Masina mandrakizay mandrakizay . Amena

Eveka/Presbytera : Homba anareo anie ny Tompo

**Ny Rehetra : Ary homba ny Fanahinao**

**35.** Eveka/Presbytera: Ny fiadanana'Andriamanitra izay mihoatra noho ny fahalalana rehetra , hiaro ny fonareo sy ny hevitrareo anie ao amin'ny fahendrena sy fitiavana an'Andriamanitra sy Jesoa Kristy Tompontosika.

*Na*

Hampamirapiratra ny tavany aminareo anie ny Tompo ka hamindra fo aminareo; hanandratra ny tavany aminareo anie ny Tompo ka hanome anareo ny fiadanana.

*Sy*

ARY ny fitahian'Andriamanitra Tsitoha , Ray sy Zanaka ary ny Fanahy Masina , ho aminareo anie, ary hitoetra aminareo mandrakariva.

**Ny Rehetra : Amena.**

## **FANIRAHANA**

**36.** Ministera: Mandehana amin'ny fiadanana ary manompoa ny Tompo.

**Ny Rehetra: Amin'ny anaran'I Kristy Amena .**

*Na*

Ministera: Koa mandehana ianareo ataovy mpianatra ny firenena rehetra (*Mat. 28, 19-20*)

**Ny Rehetra: Inty aho, iraho aho.**

*Na*

Ministera: Mandehana any amin'izao tontolo izao ianareo ka mitoria ny Filzantsara amin'ny olombelona rehetra. (*Marka 16, 15*)

**Ny Rehetra: Andao isika hitombo , handroso ao amin'I Kristy!**

*(Azo ampiasaina ireto teny manaraka ireto aorian'ny fanirahana)*

*(Amin'ny PASKA)*

Ministera: Efa nitsangana Izy. Haleloia! Haleloia! Haleloia!

**Ny Rehetra: Efa nitsangana marina tokoa ny Tompo. Haleloia! Haleloia! Haleloia!**

*Na*

Ministera: Velona ny Tompo! Haleloia! Haleloia! Haleloia!

**Ny Rehetra: Velona marina tokoa Izy Haleloia! Haleloia! Haleloia!**

**37. FILAZAN-DRAHARAHAN.**

**38. HIRA FAMARANANA**





